

歸

樸

龕

叢

稿

歸樸龕叢稿

長洲彭蘊章詠莪

卷八 墓志 墓表 哀詞 誄

舅氏顧府君墓誌銘

君諱宗萃原名惇貽字綺霞世爲崑山望族九世從祖諱鼎臣明武英殿大學士八世祖諱潛明監察御史七世祖諱夢圭明江西布政使曾祖諱存儒以孝行旌我朝祖諱登仕亳州州同父諱世放貢生授翰林院待詔以書名君爲待詔公第三子生六歲而母李孺人歿君哀毀如成人比長受業於同里龔淪年二十三補崑山

縣學生有文譽又十年而待詔公捐館舍君營窆家事竣以已產之半讓兄而自賃居於郡城之獅子林性好吟詠嘗謂人曰天下事惟讀書可樂耳累試秋闈不遇處之恬然家有義莊日久廢弛族人推君素行端方主其事子姓之給月米者皆復舊額祠墓之荒頽者葺而新之門以內翕如也幼通釋典喜持齋誦佛號晚年得盲疾足不出戶色相益空以道光十年四月十七日歿於郡城年六十有八子毓沅庠生先是君自築生壙於新陽縣來區九圖以字圩之阡元配潘葬焉繼配袁亦先卒未葬毓沅將以道光十二年二月二十三日奉君

及袁孺人柩合葬於茲原而乞章爲文以紀之章君之甥也知君行誼詳曷敢以不文辭銘曰

玉山華族代紹清芬篤生碩彥抱璞含淳齋志奚悲令德壽考銘此幽宮子孫是保

歸謝氏姊墓誌銘

先府君歿後六年而吾母江太宜人歿時蘊章生八歲弟翊六歲姊於同母生最先甫九歲長姊爲前母顧太宜人出年及笄未適人共依大母錢太夫人以居逾年太夫人壽終遺命以蘊章屬伯父侍御公以翊屬叔父太守公俾教育之時長姊將適同里汪氏伯父徵士公

暨伯母錢安人素愛之乃往依焉伯父侍郎公以伯母張夫人無所出屬夫人撫吾姊爲女我四人者以嘉慶庚申歲十二月旣望遂析居嗚呼悲矣姊旣依伯母張夫人始猶與余兄弟同塾後習女紅不復出與余閱月止一再見耳張夫人性嚴正躬儉約姊稟承閨訓居恆無紈綺之飾脂粉之妝比長侍郎公以許字同里太學生謝君次子騫太學君幼與公同受業於吳賁園先生之門敦品行有文采名詳郡志姊年十九適謝氏張夫人爲治匱飾頗盛姊于歸時姑先歿太學君以婦爲名門女曉禮義善待之姊益矢孝敬無間言謝本素封太

學君秉志高雅恥蹈世俗靡麗之習以樸素爲家法姊能守其訓操井臼奉甘旨俾壻得專心治經史泊壻遊於庠試輒高等名日起獨應鄉舉不售而姊未嘗以得失介意平生以節儉自勵亦時時舉以勗人家雖饒衣食粗給無奢尙也憶辛卯歲余因遭妻喪由京師假歸營葬居一載將復出乃置酒於吾廬邀兩姊來別翼日兩姊又攜具餞余行相與道幼時事各泣下余以姊年逾四十夫婦相莊男女婚嫁將畢我四人中最爲多福詎知此行卽成永訣悲夫姊生於乾隆辛亥八月初三日以道光乙未八月初一日遭疾卒享年四十有五壻

同邑增貢生謝君岷望名駉子二嘉孚監生嘉吉塲女
三長適汪治次適程仁潞次塲側出子一有庚孫壽銘
孫女一岷望將以道光己亥九月十一日卜葬於長洲
縣一都十四圖團山濱五字圩之新阡而屬余銘其幽
銘曰

與子同生而異處兮感歲月之悠悠矧銜哀於死別兮
孰能挽滄海之奔流已焉哉時未艾兮壽弗將衣裳在
篋兮鐘鼓在房玉棺一閉兮夜何長扁空庭兮草不芳
山之曲兮水之湄秋風獵獵兮秋葉飛歌虞殯兮導靈
旗望故鄉兮我心悲寫悲心兮託銘詞鞏佳城兮千萬

期

增貢生岷望謝君墓志銘

君諱駉姓謝氏字季英號岷望又號逸圃生先世居吳郡漁洋山之墅里村至諱國偉者始遷郡城爲君之曾祖祖諱元禮父諱希曾太學生布政司經歷職銜博通經籍好古今名人字畫碑版爲吳中收藏家名載蘇州府志母氏沈君爲太學君次子三歲失恃父愛憐之洎成童讀書敏悟習舉業文名日起以嘉慶丁丑歲受知於學使蕭山湯敦甫侍郎補長洲縣學生歲科試輒居高等四應鄉試不售遂棄舉業以增貢生終君性至孝

終身以不及事母爲憾歲時祭祀必泣下遭父喪哀毀
骨立葬祭竭誠又能友于兄弟人無間言內行醜備其
爲人恂恂然不矜才不忤物束身於規矩之中一動一
言不少苟且古所稱潔已好脩之士如君者殆其人也
家本素封而自守儉約至周人急則不吝爲人謀必盡
忠其誠懇敦篤宜享遐齡不圖天不假年而竟止於是
嗚呼悲矣君爲文刻露清秀力掃浮靡尤工短篇駉駉
乎入隆萬名家之室顧朱絃疏越罕遇知音宜其落落
寡合老於明經也書法超雋不落恆蹊又精岐黃之術
不輕試試輒驗君生於乾隆五十六年辛亥六月二十

一日以道光十九年己亥七月二十日疾歿享年四十
有九配彭氏卽蘊章女兄先卒子嘉孚監生嘉吉年十
二殤女二適士族皆彭出也孫壽銘孫女一當吾女兒
之歿也君乞余誌其墓將葬矣因君邁疾不果今遺孤
卜日將奉柩合葬而復乞余言不敢辭乃爲銘曰

闡先德貽令名守素履安且貞勒元石播芳聲昭來許
視此銘

亡妻徐孺人墓志銘

孺人徐氏浙之德清人父諱振甲歷任江蘇長洲江都
清河河南涉縣知縣孺人年十六始與余締姻時父及

所生母王孺人俱逝長兄諱端任江南河道總督孺人
挈同母弟妹二人依焉嘉慶己巳冬余就婚於河督官
署明年夏偕渡江歸余幼失怙恃依於伯父侍御公比
孺人來歸則伯父先卒惟伯母朱恭人在堂孺人敬事
如姑恭人晚年多病常在牀蓐孺人奉湯藥每至漏三
四下不告勞如是者八年洎恭人歿親含斂者唯余夫
婦及七歲嗣孫孺人哀痛盡禮族黨稱之余從兄編修
遠峯公侍御公子也其歿於京邸也余就婚於徐未匝
月聞訃至卽促裝歸省伯母於家時屆歲暮層冰峩峩
飛雪千里孺人不以新婚故挽留及余復往則已三閱

月孺人但致書慰唁伯姑無一語促余行者余知其能
識大體矣初余在巽序有虛聲息於學孺人輒勸勉之
嘉慶戊寅獲舉於鄉自是應禮部試屢見擯遊學住京
師蓋離別之日多矣道光丙戌余以大挑注選教官其
明年援例改內閣中書戊子上巳入都比至則已聞孺
人得咯血疾猶致書謂余年近強仕宜努力進取勿以
爲念余欲迎孺人北去又病不果行余家世守負郭田
數頃時屢遇災荒又食指漸繁孺人隻手摒擋心力俱
瘁長子慰高出爲編修公後孺人爲娶婦仍延師課讀
諸兒入塾者皆督課不輟勿煩余內顧至庚寅冬病益

劇時余承校館書心懸懸而凶耗已至嗚呼念余與孺人將恐將懼龜勉同心乃聞其三年之病而遊宦不歸竟以永訣生相憐死相捐能不悲夫孺人曉文字勤女工平居操作不倦衣裳不敝不更勤儉有過人者編修公遺一女自幼及笄常與孺人共事朱恭人相得無間當孺人在室時撫弟妹有恩及疾革弟安徽黟縣令竝將謁選吏部道出吳門遲留不忍去三閱月竟得視含歛此誠孺人之弟之賢亦孺人友愛致之也孺人生於乾隆五十五年十一月二十一日卒於道光十年十月十一日年四十有一子男七慰高出嗣元夔年十二殤

祖芬祖賢祖彝來高柱高女子三孺人歿之明年余假歸遂以十二月二十二日卜葬於長洲縣九都二十四圖生字圩之壤并自塋生壙而系之銘曰

白楊灣側兮海涌峯旁高原十畝兮花木成行是名瘠土兮不殖稻粱卜云其吉兮人無我殃百齡易逝兮從汝歸藏

元夔墓輓几銘

竹西墨客葬其子元夔於先塋之北丙舍之東百步封樹旣畢乃造輓几於墓俾後人無忘歲時因泐銘焉其辭曰

彭氏子字韶成生傷月歲壬申冀七葉時加寅授大學
誦孝經折右股甫六齡倍厥數長埋形紀生年終一星
在且月己未辰招不返勲所生窆桐棺勒斯銘嗟童子
知識清志缺缺魂冥冥藐五尺完天真殤非殤彭非彭
億萬劫同埃塵竹西客長洲人爲人父禮不名慮無徵
書弟兄方石闕記用緡

安徽貴池縣知縣盧君墓志銘

代

君諱元璫字蘊山號湘艇先世有諱宣者仕宋爲鹽鐵
使南渡家於吳世有休問祖駿聲府庠優廩生以君官
贈如制父念昔妣氏袁以君及孫毓嵩官累

贈如制君幼而明敏器識過人年十九入吳庠試輒冠
其曹食餼焉累應鄉舉薦而復遺益肆力爲古文辭博
學無所不覽尤工章奏書記數千言援筆立就悉中窾
要一時士大夫交口推服名公卿之來東南者厚幣禮
於其廬於是南遊粵海北涉灤河轉移十載間所居幕
府莫不傾心碩畫嘉納讜言而福文襄尤重君君先以
乾隆五十三年受知於學使沈雲椒先生充拔貢生明
年秋屆督撫學政彙考之期文襄以君佐戎幄奏請入
冬補試得

旨俞允士林榮之又明年應朝考分發州倅赴皖檄署

池州府通判徽州府同知丁父憂起署甯國府通判時
川楚苗匪未平皖省慮徵調不時設軍需局以君任其
事不逾月而羽檄飛馳從容應付上官能之借補懷甯
縣丞又署廬江績溪兩縣及池州府同知事池濱大江
川楚餘匪竄散入江劫行旅爲患君督率弁兵偵獲置
諸法患遂弭嘉慶四年平川楚撤軍需局勾稽支放白
金二十餘萬兩無纖毫私濫遂膺計典擢桐城縣知縣
桐故多積案釐結千餘件稱神明焉因病解任逾年報
痊補天長縣知縣淮漲告災據實陳上官繪圖入奏給
一月口糧君親履支放吏胥不得爲奸民沾實惠逾年

諫貴池君以母年高不欲任繁劇遂乞終養免喪出署
太湖建平兩縣事坐補貴池君躬任勞瘁諸務畢舉以
城隍圯壞詳請鳩工并城中堞樓一臻完固又以齊山
隄傾剝有年遇江水至輒漫隄而上行人苦之乃捐俸
加築栽柳千株以固其根至今稱盧公隄於九華門外
建大橋修郡城節婦祠邑人戴德嘉慶二十五年春引
疾乞休士民攀留不果行以九月二十日卒於貴池於
虜君之才而位止於是宜以不盡展長爲君惜然君所
裕於平居之學識出言以引重當時而裨

國計民生者大矣豈以區區職守限哉當文襄之平黎

阮也勦與撫人持異說君言於衆中日南交瘠薄取其地不足以資中國且欲搗覆其巢則濱海諸邊不可以無備今舟師之出南關者少則萬人抵其清化中山而後宣光小鎮安無憂矣遊兵之巡海者少亦萬人截其逋逃之路而後欽州崖州無憂矣徵發不下二萬而又三時瘴毒我師之出必屆沍寒一舉不勝坐待來年曠日持久勞費不支

朝廷中外一家黎阮皆吾民也黎弱扶之阮降受之於國體何損文襄然其言安南降遂撤兵稼門汪公之撫吳也嘗以蘇太屬四邑漕糧全行豁免慮

旨籌議或議緩賦而徵漕矣以君言動碾常平倉穀北
運成熟均年糴補入奏准行始息徵漕之議傳曰仁人
之言其利溥不其然歟宜其終享遐齡以迺後人也君
生於乾隆十七年二月二十三日春秋六十有九歷官
三十年以功最加三級紀錄八次以毓嵩官封奉政大
夫戶部雲南司主事加二級娶張贈宜人先卒毓嵩其
所出子由嘉慶庚辰進士授今職慶飴慶榴俱側室出
女二嫡出者一適庠生彭蘊楷側出者一孫承露孫女
二墓在封門外黃石橋之原先塋之穆張宜人先窆焉

銘曰

有矩其行而富於文辭有譽其言而效於當時以休我
王師拯彼羣黎克施有政惟爾民是宜艱禍以恤強虜
以夷獄訟以平軍旅以支昔時瓦礫今墉今陣昔時汗
漫今梁今隄不惟保障風俗攸齊民之父母微斯人吾
誰與歸

文林郎改亭朱府君墓表

君朱氏諱宏基字開承號改亭先世歙人有諱某者明
季避地來蘇生文理爲君曾祖有隱德享遐齡祖諱藻
父諱明德母氏戈君少敏悟攻詩書年十四遭父母喪
依舅氏居叔聖儀無子以君兼祧焉家貧遂棄舉業習

貨殖以自贍而諸兄構訟不休君乃讓宅於兄自遷他所其後諸兄皆困君推解不倦養生送死一身任之洎中年家漸饒清釐先世墓地歲時祭掃調恤族黨旁及故交有告急無弗應者平居喜誦先儒格言雅善鼓琴與交遊者皆鄉之耆儒宿學德性和平能容人過嘗有穿窬入室視之則鄰家子也與之金勸其改悔終身不言其姓名君之存心忠厚大率類此卒於乾隆壬寅年三月二十一日春秋五十有九道光八年以子應潮官勅贈文林郎安徽桐城縣教諭元配馬早卒繼配張左中允書勲妹素習儉勤克循婦道洎君歿又能教子成

名以承君志宜其終享高年茂膺多祉也蘊章幼失怙
恃依於伯父侍御公伯母朱恭人太孺人女也因知贈
公有君子之行而太孺人憫憐孤弱垂愛拳拳尤所永
矢不忘者卒於嘉慶甲戌年十月初二日壽七十有七
敕封太孺人子應潮乾隆乙卯舉人歷任安徽亳州學
正桐城縣教諭觀瀾監生皆太孺人出孫逢慶庠生錫
壽監生逢慶所生母早卒幼撫於太孺人追維懿行乞
言於余不獲辭乃爲文表墓而系以銘曰

韋齋之裔由歛遷吳四傳至君廉讓是居其風則俠其
行則儒詒謀式穀澤以詩書型于嘉偶令德非孤克寬

克惠潤黷嘘枯童孫繼志永念勤劬爰書實行金石不渝

御史盧君哀詞

并序

君諱毓嵩號立峯蘇之元和人與余家姻舊余少應童子試嘗與君偕洎試鄉闈同舉又同上春官嘉慶庚辰君成進士授戶部主事及道光丙戌余試春官假館於君寓戶部有捐納房司其事者例由上官預記其名依次充補君當補爲後一人所越而以君揀發東河工次學習未幾捐納房舞弊案發越補者坐罷而君獨免君在工二年例以同

知用弗樂就還戶部充倉監督任滿資深始遷員
外郎擢監察御史辛丑分校禮闈得士龍啓瑞等
若干人壬寅正月十一日卒年五十有三哀之日
訥訥其言而富於文章踽踽其行而登於廟廊嗤捷徑
之窘步兮君獨履乎康莊謂是天之所佑兮胡年壽之
弗將慨大造兮茫茫叩九閭兮難訟旣勤學而多材兮
又遇時而不顯於用溯髫髻之居遊兮念舟車之與共
君先我而大覺兮嘆余生之若夢心銜哀而莫訴兮奠
椒酒而陳詞望故鄉於天末兮魂髣髴其言歸

刑部主事馬君哀詞

并序

君諱學易號吉人蘇之長洲人道光壬辰禮部試
第一授刑部主事君爲人慷慨好義勇往任事京
中有長元吳會館余司其事因直樞廷城居日少
弗暇顧遂邀君相助君經紀其事秩然就理余嘗
募同鄉之在外者捐貲增建館中屋宇君庀其事
工蕪而歿時道光癸卯七月或傳君爲順天貢院
土神云哀之曰

惟君倜儻之資忠信之質見義必爲勇往無匹扶輪大
雅之才摘藻天庭之筆進無所用其文章兮勉趨衙而
讀律十年郎署兮驥服鹽車苦吟一卷兮獨飲一盞如

梅之瘦兮如鶴之癯惟滂沛其言論兮神不足而氣有
餘知外強之不可久兮喟日月之不居當盛年而申謝
兮曷以慰白髮之倚閭嗟人生有大覺兮如水之赴歸
墟順陰陽之闔闢兮亦何論乎疾徐逝者冥冥兮生者
歛歛歿而爲神兮其信然乎吁

通政曹公哀詞

并序

公諱恩濙號鼎泉安徽歙縣人尙書文敏公孫太
傅大學士文正公子也爲人謹飭居家儉樸克守
素風幼勤於學屢試京兆不售以父勞蒙

恩賜舉人再試禮部尋因兄卒

特恩移應刑部郎中洎太傅卒復

擢授四品卿服闋起補鴻臚寺卿洵升通政使司通政使道光二十四年三月二十六日卒於位年四十九有六公爲余從妹壻與余交厚哀之曰

惟韋平之貴胄兮毓克家之世臣誦鯉庭之彝訓兮服仁義而書紳承

堯廷之延賞兮荷

三錫之

殊恩擢銀臺之峻秩俾致身於青雲將棟梁兮是任酬輔弼之元勛胡修齡兮弗劭繁霜隕乎陽春棄藐孤之

無識兮慟嘉偶之如賓骨肉悲而腸斷朔濟泣而聲吞
嗟茫茫兮天道欲上叩兮紫闥憶弱齡而岐嶷兮結絲
蘿之良因余既長而蠖落兮抗九陌之黃塵嗟雪來兮
柳往感他鄉之苦辛數晨星之故舊君獨與我乎相親
泊中年而筮仕兮欣接迹乎金門被

九重之渥洽兮揚世德之清芬謂修途其未艾兮永夙
夜之劬勤曾崇朝而揮手兮哀一逝而離羣竟賡志以
沒地兮從隨武乎九原舉總帷而雪涕兮招不返乎君
魂摛余懷之結轡兮寫幽怨於斯文

宋穉宣哀詞

有序

宋氏子景宣字穉宣蘇之元和人泰州教官翔鳳
子嘗以文字就正於余幼承家訓謹厚好學甫逾
弱冠以應試卒於京師哀其質美而無年也弔之

曰

葑溪之宋多聞人汝年最少謹且醅從余考古兼論文
幾年講貫情相親一朝奄忽命不辰遺書盈篋委埃塵
天涯含斂親朋少孤櫬還鄉嗟遠道噫吾謂汝有成兮
而天使汝天占素履兮無愆等彭殤之遲早返大樸於
鴻鈞兮奚羨乎罔生之壽考

嚴介堂哀詞

有序

介堂諱寅蘇之長洲人幼失學年十四始讀四子
書三十遊於庠志行高潔無意進取苦吟郊島之
詩善學歐虞之字旁及斯冰篆法荆關畫意皆能
陟其堂與見重於時卒年七十有一余與君自應
童子試相識後從君討論篆書畫法稱莫逆交老
成凋謝黯然神傷作詞以哀之曰

翳君平之苗裔兮邈希世之高蹤薄榮名而不繫兮守
澹泊之淵衷耕硯田以食力兮寫磊落之心胸憶弱齡
而結契兮每染翰以相從詫新吟之無匹歎墨妙兮何
工迓徐穉而下榻兮盤桓乎一畝之宮喟歡蹤之不再

悵離別兮倥偬折嶺梅兮遙贈猶雁帛之常通梅乘輅
兮南去慳一笑兮相逢忽巫陽兮下召歸曼卿兮芙蓉
失粉榆之老友兮感吾生之飄蓬緬遺型於黃髮兮欽
石隱之高風望蘇臺兮雪涕恨峻嶺兮千重奠椒漿其
莫致兮寄哀思以無窮

錢載川詠

有序

載川諱欽浩太倉州人爲余姑之子也父象武先
生早卒遺腹生欽浩母氏教育之年十四遭母喪
哀毀如成人事祖盡孝內行醅備弱冠補邑庠生
文譽日起好讀先儒語錄服膺朱子小學王少湖

先生俟後編家非饒而能節儉時以其餘恤饑寒
里中稱善人生於乾隆癸丑卒年三十有四誄曰
慥慥其行惺惺其心醞修實學不忝儒林上溯濂閩古
訓是式孝弟慈祥君之懿德弱齡孤露與我同悲中年
摧折九族歔歔君命弗延君宜有後子孫繩繩家風克
守

節孝沈孺人諫

有序

孺人爲余伯祖學士鏡瀾公側室公歿孺人年十
九無子女而能矢志從一爲人所難居宅東小樓
家人稱爲東樓太君道光元年膺

旌門之典又六年卒春秋五十有五諫曰

幼不聞詩書之訓長能砥節守身既邀榮於綽楔兮宜
褒號曰孺人喪所天兮猶弱小詠柏舟兮憂傷老不遇
疾風兮安知勁草皎皎其行兮嗃嗃其言家人吉兮悔
厲先樓迎朝旭兮幾春秋遺徽云杳兮令聞常留

歸樸龕叢稿卷之八終

歸樸龕叢稿

長洲彭蘊章詠莪

卷九 行述狀 傳 祭文 壽序

伯母朱恭人行述

恭人朱氏父改亭公諱宏基以子應潮官贈修職郎安徽亳州學正母張贈孺人世居吳西郭外之楓橋恭人年十九來歸爲我伯父侍御公繼配於時大母錢太夫人在堂前出子蘊輝生甫四歲恭人事太夫人有禮撫子有恩門以內雍如也逾年侍御公領癸卯鄉薦又四年丁未成進士入兵部由主事員外郎郎中累遷御史

恭人隨至京師經理家務一不以瑣屑事關侍御已而
蘊輝踵起以戊午領鄉薦明年己未成進士入詞林蓋
自戊申至京師其間十二年爲恭人一生順境云後一
年侍御公乞假還省大母錢太夫人疾恭人亦隨到家
視湯藥者三閱月而錢太夫人棄養送終儀物恭人必
誠必信勿使有憾宗黨稱焉比服闋侍御公無意復出
居鄉好施恭人實左右之丙寅公邁疾歿於家疾亟時
恭人叩天籲禱願以身代及公歿誓以身殉雖頻遇救
解然自此抑鬱成疾常在牀蓐矣公旣歿之三年蘊輝
以編修卒於京師逾月而遺孤慰祖殤又五月蘊輝繼

娶吳扶柩還抵袁江併歿先後訃至恭人痛侍御公之
無後也求死者屢繼又念似續無人勉留有待蘊章少
失父母伯父母實撫育之及是已娶婦明年生子慰高
恭人不勝喜命抱以爲蘊輝後先是侍御公與元配陶
恭人合葬於穹窿之善人橋蘊輝前配金別葬吳山形
家均言不吉恭人乃卜地支砌之西隆池以辛未十二
月奉侍御公與陶恭人遷葬主穴以蘊輝暨前配金續
配吳耐於穆位蘊輝有遺女淑英幼依恭人後適今甘
肅布政使商城程公國仁之子家穎甲戌冬家穎來婚
恭人愛之猶孫也未二載家穎夭亡淑英扶柩往侍其

舅姑恭人哭而送之悲不自勝由冬至春病益劇以丁丑四月二十一日端坐而逝恭人仁慈尙禮深非世俗涼薄之行居侍御公喪三年不矧祭祀必泣下在室時父改亭公疾亟封股以進其後聞母張孺人訃號慟奔歸髮不及櫛至性有過人者嘗自謂女流不知外事自侍御公歿每事必諮於伯父秋岳公然後敢行自奉儉約而饋遺戚黨必從厚有告急無弗應者遇婢媪寬偶任勞苦嗔咻之如不及居恆閉一室焚香禮佛號雖疾病不少懈工楷書所寫內典不下數百卷所刊印諸善書無慮數千卷其他修廟宇造佛像建醮修齋布施不

倦冬施棉衣夏施藥茶朔望放生歲暮濟急不勝書嘗
肩輿過圮橋見盲者墮橋下心惻然急命工修之里中
有羅雀者與之金令改業羅者感毀其具而去持殺戒
既久不食雞鶩魚方別孕則弗烹蟲蠹草木弗踐弗折
也烏虜以恭人之存心忠厚謂宜食報於將來何意札
喪瘡癘相仍遭罹荼毒十餘年迫於衰暮不及俟慰高
之成立而稍慰其苦心冥冥者其可知耶其不可知耶
恭人生於乾隆甲申六月二十日享年五十有四累遇
覃恩由宜人晉封恭人蘊輝翰林院編修前卒孫崧高
慰祖俱殤今以蘊章子慰高後蘊輝實爲恭人承重孫

蘊章蒙恭人教育垂二十年覆翼之恩等於生我雖以
慰高爲恭人嗣孫年甫七齡懵未有知大懼恭人生平
嘉言懿行久而就湮則有善弗稱誰執其咎故謹述大
槩俾慰高長而服念庶幾流傳世世勿忘勿斃云

先妣江宜人行述

嗚呼吾母生丁荼苦年止三十三而從府君於地下不
及俟不肖等之成立清夜悲思百身莫贖方吾母之歿
也不肖蘊章年八歲弟翊年六歲音容笑貌猶能記憶
一二者蘊章也翊更不省矣蘊章自握管爲文每思追
述梗概自顧謏劣慮不足傳吾母之彷彿蓄於心者又

十年矣日月不居由丁逮壯學不能文舉不成名無可待也大懼一旦填溝壑而吾母之苦行不傳不肖死不瞑目爰就記憶所及謹次成狀俟乞言於表幽之君子焉吾母姓江氏世居吳郡外祖考慕邨公諱仁例

贈修職郎陝西候補縣丞外祖妣朱孺人生女子二吾母其仲也幼習詩工書及女紅事歸吾父爲繼配生一女及不肖蘊章逾年而府君歿遺腹生翊前母顧宜人遺二女及是又喪其次方吾母煢煢衰經惟伯姊實在左右其餘孩提襁褓尙勞顧復而誰知吾母之悲者又以大母錢太夫人哭府君慟終不敢流淚於大母之前

吾母述哀詩嘗自言之矣詩曰護庭侍疾藥初嘗百卷
金經保壽康割股於今懷孝子高堂那不鬢絲霜又曰
隔年手澤看猶新虛幌低垂硯積塵未卜兒曹知護惜
一編遺稿舊精神嗚呼是心聲也聞吾母爲諸姑言兒
女衆他時婚嫁艱不得不自刻苦旣持長齋每食以菜
蔬自給以肥甘飼不肖等量口計錢出入必有注記及
病且篤伯舅客帆公來視見之歎曰何自苦乃爾耶又
嘗手製衣裳帷被不假縫人歿之年爲不肖製半臂一
領比成童猶時時服之嗅咻不肖等飲食寒暖纖悉畢
周讀書則不稍姑貸每出塾有餘晷必更授數行夜分

溫誦或講說聖賢故事寒燈一穗白粥半甌疊疊諄諄
言猶在耳嗚呼吾母之辛勤教養冀不肖等有一日之
成立以慰府君於泉壤者蓋心力於是億矣素有肝疾
疾作不求醫治太夫人聞呻吟聲遣問則減其狀以對
已未正月將歸甯外祖母朱孺人於家晨起同雲匝天
侍嫗曰天將雪盍明日往乎母堅往蓋自是與外祖母
永訣矣還病日劇以二月初五日卯時長逝太夫人臥
病撫牀痛哭不肖懵然頑穉而烏識所以喪吾母者嗚
呼痛哉吾母自言幼時有嫗來指謂家人曰是有夙根
善視之恐不能久也言訖遂去故常自以爲不壽由後

思之彼媪者豈果神仙中人耶胡不幸而其言之驗也
吾母既修淨土誦阿彌陀經并稱禮佛號日有課程有
回向詩云不生天亦不生人願力唯憑一念真離卻娑
婆汙濁世池蓮開處樂長春又云無量光中無障礙迦
陵常出好音聲此時自得無生樂回入娑婆度衆生又
頂禮西方公據畢誌以一絕云專修淨業圓成後到處
蓮花腳下開感得彌陀親授記一聲接引佛西來嗚呼
讀吾母之詩其視死生如去來非發於至性之真誠排
惻何以及此猶憶歿前一年挈不肖上塚徘徊涕泣曰
以後汝自來耳然則吾母其先知耶吾母謹於禮而訥

於言秉性慈惠娟蠕之細戒勿傷也人謂吾母篤心苦
行蹇於前當必亨於後孰知夫艱難之歲月猶且不能
少留如此也母歿之明年太夫人歿不肖等男女四人
分依伯叔父母以居並飲食教誨以迄於嫁娶今不肖
等美食暖衣矣回憶吾母當日之辛勤其何以自安耶
嗚呼痛哉不肖早遭憫凶凡所見聞率皆瑣細其他嘉
言懿行非孩稚所能知者槩不得而稱矣母生於乾隆
丁亥九月初四日嘉慶四年恭遇

覃恩叔父葦間公以本身官階

馳贈府君奉政大夫禮部祠祭司主事加二級前母暨

吾母皆受宜人

贈初府君葬顧宜人於堯峯西麓月字圩之阡府君及
吾母卒先後合葬而以顧宜人出之仲姊耐焉不肖蘊
章嘉慶戊寅舉人翊監生伯姊適元庠生汪灑叔姊適
長庠生謝駮孫男四人長慰高出嗣次元夔次祖芬次
祖賢俱蘊章出孫女五蘊章出者二甥出者三嘉慶庚
辰六月不肖男蘊章泣述

從兄編修公行狀

余兄編修公之歿也其座師今予告大學士儀徵阮公
旣爲誌其墓矣顧誌墓詞畧不可無行狀以詳之憶余

幼失怙恃九齡依於伯父侍御公公視余如子兄之愛
余亦無異同生也乃未幾而伯父歿兄又繼之骨肉顛
沛未有如余之甚者追維往事未嘗不盡然神傷今自
兄歿後三十六年余長子之爲兄後者已舉於鄉長孫
將成童而余年亦垂老矣設一旦從先人於地下則更
無人知兄生平梗槩而稱道之者其何以示後乃爲之
狀以垂家乘曰公諱蘊輝字葆真又字璞巖號遠峯一
號蘧生爲余伯父侍御公子伯母氏陶育兄五十日而
卒繼伯母氏朱兄幼讀書資性魯鈍塾師輒督責之及
學爲文則穎悟絕倫侍御公死同里陳栢亭先生超曾

爲之師居二年盡得其秘年十七援例入大學應京兆試卽膺房薦越三年爲嘉慶戊午科遂中順天榜第二名已未成進士

殿試二甲

朝考入選改庶吉士學習

國書其明年伯父假歸省親兄從焉旋遭祖母喪是冬十二月入都辛酉散館名列一等授職編修兄入都後原配金歿於家是秋假歸居一載續娶於吳爲協揆錢塘諱璫公女兄往就婚時協揆任江南河道總督後移任河東河道總督兄亦往依焉歲丙寅春入都供職是

秋侍御公歿於家奔喪歸其明年三月葬公於穹窿山善人橋之阡八月奉母往杭州雲栖設水陸道場追薦侍御公比還仍往依協揆於東河督署並主講任城書院服闋後由濟赴都充 文穎館協修歲已巳恭逢仁宗皇帝五旬萬壽恭進詩冊蒙

恩賞賚是夏 南書房乏人

命擇翰林學優者試之

欽取一等四人卽 召入直二等四人兄名居首復蒙賞賚兄本好道家言戒殺放生持齋之日居多又性勇往任事不辭勞瘁得咯血疾至是復以詞章之學耗其

精神遂以十二月初九日歿於京邸年三十一列翰林
十載供職不及三年未嘗與大考及考試差也兄歿後
未幾孤子慰祖殤其明年七月繼配吳歿於其父江南
河督官署當兄之歿也余壻於徐未匝月居妻兄宮保
公端副河督署聞訃急歸省伯母朱恭人於家至則伯
母已臥病在牀因侍湯藥閱兩月始復往時協揆公已
遣人迎余兄柩於京而別遣人先迎嫂至嫂留協揆公
署以待柩至而命余孳婦先歸以侍伯母余抵家後復
獨往視嫂嫂亦病無復生理旋卒至是冬兄與嫂之柩
始同歸里皆協揆公爲之措置也其明年余長子生族

人議以爲兄後朱恭人乃改卜吉地於支硎山西隆池之壤遷葬侍御公陶恭人并自營生壙而以兄與二嫂祔焉兄素行端謹善事繼母家無間言處事通敏又時有豪俠氣所交惟脩身行善之士引爲同志餘皆落落弗措意也少勤於學精猛過人舉鄉時年甫二十讀其闡作者輒疑爲宿學蓋其文從先輩名家陶鎔而出精心結撰不落恒蹊其視流輩作大都弗愜於心也嘗見余遇事舒緩爲學懈怠之曰凡人於當辦事須立辦之遲則前事未了後事復起必有廢事矣又曰程子講讀論語未讀時是此等人讀了後只是此等人便是不

曾讀讀古人文亦然余年十五應童子試不售兄欲爲
納粟應京兆試余曰弟文見擯於童試安望鄉薦況祭
掃無人不如居家仍應童試兄以爲然弗強也丁卯家
居每教余作文之法授以夏小正逸周書竹書紀年路
史白虎通諸書使誦習焉臨別時舉伯父詩稿命余收
藏卽今所傳簡綠詩草也余家世有任恤之行兄有志
承先其在袁浦嘗因水災散金濟飢復勸協揆公爲之
全活甚衆在京亦有施衣施藥等善舉刊道藏經築呂
祖廟於德清山中費各數千金弗惜嗚呼以兄之賢且
才而又遇於時乃天不假年以光門祚誠不幸也俯仰

今昔能不悲哉兄生於乾隆己亥年十二月初二日嘉慶己巳恭遇

覃恩授奉直大夫翰林院編修加三級元配金同郡吳江人尙書文簡公孫女內閣侍讀諱芝原公女溫淑儉勤事姑惟謹卒年二十四贈宜人繼配吳慈祥爽直待人
有恩封宜人卒年二十六金出子一吳出子二皆殤金出女一適商城程鶴樵中丞子家穎吳出女一殤嗣子慰高道光癸卯舉人孫翰孫巖孫道光二十五年四月弟蘊章謹狀

歸蔣氏姑小傳

祖考贈榮祿公生女子四人姑居其三榮祿公早世祖妣錢太夫人維持門戶婚嫁男女姑適同里候選訓導蔣君諱世駿蔣本世族姑能式禮承教敬事舅姑和於妯娌族黨稱賢訓導君早卒有妾某氏生一女姑善撫之妾亦矢志無二相與誦佛號究內典垂二十年無間言余家雖非素封以累世受祿常出其餘以施濟鄰里從祖二林公所行善事最廣又教人專修淨土閨中被其化者余伯母瓊樓陶恭人其尤著者也姑在室時卽慕二林之風及稱未亡人益苦志持常齋竭力施濟教孤子攻詩書守家訓以承先澤生於乾隆己丑年卒於

道光乙酉六月二十三日子泰均元庠生

歸錢氏姑小傳

姑生二歲而祖考榮祿公歿祖妣錢太夫人躬親操作
婚嫁男女姑適太倉錢君象武卽太夫人從子也甫一
載象武君早世姑誓以身殉以上有舅姑且有身勉留
有待及產得男始慨然以撫孤自任不復萌殉夫志錢
本寒素姑執筐績爲婢媪先上奉甘旨下畜孤兒搢拄
十餘年家漸饒延師課子督責不恕嘉慶丙寅九月余
伯父侍御公歿姑挈子欽浩來會喪欽浩忽患病甚劇
姑焚香籲天曰未亡人可死毋絕錢氏一綫也未幾欽

蘇林傳
浩病瘳姑驟病而歿生於乾隆辛卯卒時年三十六守節十四年請於

朝得

旌如制後欽浩遊庠克守遺訓踐履篤實里中稱善人年三十四卒今其子復有聲巽序姑之遺澤長也

沈師竹小傳

師竹沈氏諱林字安雲師竹其號也世爲蘇之元和人祖心伯爲名醫以字行父諱文英早卒母陸氏師竹旣少孤長兄安伯世其祖業以贍其家師竹孝於母敬於兄門內雍如嘗就予家塾與予同受業於袁韻亭先生

余幼承家訓戒濫交謝徵逐時年十五里中少年無一
相識者得師竹朝夕遊處甚喜共几席者二年每篝燈
夜誦輒至聞雞應童子試必偕予先遊庠後三年師竹
乃受知於學使諸城劉文恭公時年二十三矣癸酉七
月二十日以瘵疾卒年二十五師竹爲人循謹篤實勤
苦嚮學楷書宗率更雖少年蒼勁若老宿生平無浮薄
之情矜誇之氣端人也嗚呼以君之賢且才使天假之
年當必有表見於世遽以天折爲可痛矣君歿後配閔
氏守志撫孤後君二十一年卒合葬於壽門外顧村橋
憶辛卯歲余乞假旋里過安伯門見一蒼頭猶嘗負笈

從師竹者今閱十五年再過里門安伯已歿師竹之子毓崧亦逝僅存幼孫德基而應門蒼頭亦不復見矣追維童年儕輩不獨其人已杳卽其後嗣亦漸零落能不慨然嗚呼善人無祿天道難知冀其孫能紹述焉

杜拙齋傳

杜厚字載焉蘇之元和人以孝友聞於閭里不治章句學獨優游翰墨以終吳中人士無不知君之名爲人靜默寡言笑與人交恂恂自下有嗜古癖習漢隸書三十餘年蒼勁有法人多宗之與余兄弟友善余嘗作詠花十八生圖以君年最高且品節孤峻宜詠菊君詩云曠

兮宇宙間物各有本性草木稟靈秀數華衍明靚唯此
耐凜霜淡然心不競耽幽誰云傲賦色得其正秋風厲
南山埽盪寒空淨百卉謝枝葉奇芬獨內孕眷言知者
希千古一陶令願當葆真素晚節完堅勁詩品蓋在王
孟間然平生不多作偶有得輒棄去故世亦無傳焉其
意趣有可想見者所居借月樓湫隘近市乃卜地改築
面南園帶葑水郭西諸山蒼翠入几席間因悉貯平生
所嗜碑版書籍而嘯歌其中飄飄乎有憑虛之想焉甫
一載遘疾而歿年五十有六

贊曰易筮幽人坦坦貞吉豹隱鴻飛大巧若拙吉金樂

石好古多聞孔門游藝據德依仁偉長五車元龍百尺
願爾後昆保茲手澤重親致孝門內蒸蒸施於孫子祖
武是繩

江春巖傳

江映鋈字靜涵號春巖吳縣人爲余外祖慕村公諱仁
冢孫伯舅客帆公諱廷訓長子也其先有諱雲者以孝
行旌於

朝三傳至客帆公教子讀書君年二十遊於庠又十三
年始食餼焉每試輒居高等獨不得志於鄉闈以歲貢
生終君內行醞備盡孝於親母錢孺人卒哀毀盡禮客

帆公晚年失明君既無兄弟獨與其婦左右服勞垂二
十年筆耕以奉甘旨門內雍如也及遭父喪入山營葬
地歸途遘疾失足仆地比至家遂卒時道光十五年三
月初八日年五十有二配李氏無子以從弟文鳳子湜
爲後君所爲應舉文氣清詞華理法周密里中後進多
從之遊詩學唐人尤工琢句存者若干首又詩餘若干
闕平生交遊唯同里胡實甫希周林慎齋衍源沈雱門
沂曾落落數人而已余與君遊處最久未嘗聞君言人
過失惟汲汲稱人之善君之詩詞實足出而問世顧常
韜晦不輕示人嗚呼以君之行求之古人中當爲有道

之士況近世耶歿之明年鄉人重君行誼請於有司祀
吾郡敦行祠名副其實也讚曰

孝子之門篤生端士不忝純修世濟其美啜菽盡歡緼
袍匪恥惟心之亨惟命之否坦坦何疑貞其素履敦行
之祠馨香梓里令聞無窮君死不死式闡芳徽以當銘
誄

程小棠小傳

小棠程氏諱家穎河南光州商城人父諱國仁由翰林
歷官刑部侍郎浙江山東貴州巡撫小棠其第四子母
洪夫人尤愛憐之余兄編修公與巡撫同年進士友善

遂以女訂姻焉未幾兄歿嫂吳宜人亦逝惟余伯母朱
恭人在堂恭人晚歲骨肉凋零愛女孫不忍遠離乃招
壻就婚延師課之小棠至余家時年十七思其父母歲
時必具衣冠望北遙拜甚至泣下余憫其孝而以伯母
挽留無術使之歸也逾年小棠乃獨歸省親未幾復至
又逾年患瘧驟亡年止十九時嘉慶丙子六月二十八
日也君歿時巡撫公陳臬山左使人迎其柩而余從女
亦隨之歸迄今道光丙午君之歿三十年矣余從女守
節例得旌於朝矣回思當日遊處之樂死喪之哀歷
歷皆在目前而不覺歲月之長如此也能不感慨係之

哉小棠好古人書畫與余有同嗜又善鼓琴每與余談
文字披縑素焚香啜茗操琴一曲意致洒如也又嘗償
余兄弟及客數人遍探天平靈巖諸勝自謂不負姑蘇
作客自君歿後余益寡歡其明年春嘗獨往山中居七
日遍尋諸山蘭若觀數百年古梅遊香雪海泛舟太湖
登石樓石壁得詩數十首以歸而悲君之弗與共也今
君歸葬商城墓木已拱而余亦將老矣追維往事爰爲
之傳小棠無子今以其叔父之孫昌卿爲後云

沈式如小傳

式如諱秉鈺吳岸生父俠侯先生以經學名吾鄉式如

承家學淹貫經籍尤工應舉文楷法師鍾太傅嘗與井
叔王君嘉祿及余同受知於學使新城陳侍郎式如遂
食餼焉後余與井叔以詩文相切劘無數日不相見式
如則不然或數日亟見或終歲僅一再見而投契之情
無異也沈本世族所居懷雲亭止割舊宅一隅尙有池
塘竹木頗稱幽居俠侯任荆溪教官式如時往省親而
家居之日爲多式如爲人美容儀善飲酒與人交有肝
膽居雖貧未嘗以斗米尺帛干人其植品亦復峻潔使
得置身清秘以文章風節表見於世誰曰不宜乃坐困
名場中年殂謝爲可惜也余旣悲井叔早世今去鄉數

年又聞式如之喪里中一二舊交零落盡矣能無慨然
爰書以志其梗概

黃讓翁傳

讓翁黃氏以字行不傳其名幼讀書應童子試不售遂
棄去日誦文昌陰騭文以自警家貧無藉間爲人司會
計取酬金以自贍余從祖二林公爲善於鄉設近取堂
行施衣施棺卹嫠惜字放生諸善舉以讓翁經紀其事
二林公歿伯父秋岳公踵行之亦重翁使佐理焉翁旣
終身行善臨財不苟又好道家言里中有玉笙壇諸善
士禮玉局心懺於其中或作或輟翁獨久而不懈卒年

五十餘越數年其妻夢翁至衣冠與從如達官者曰吾將去故來別汝問所往曰當爲貴家子矣東鄰某秀才素識翁是夕亦夢翁至曰我欲以某日來汝家如不至則出門往水濱相引可也時某婦適娠及期有難產狀家人驚恐某忽憶夢中語卽往水濱復入室則已聞呱呱啼聲時嘉慶辛未秋也後秀才掇科第仕於朝官日顯今其子亦登賢書矣夫鬼神之事誠不可知然左氏言夢無不驗者今以翁素行推之其理當不虛也遂爲之

傳

靈鷲兩僧傳

吳之婁門有靈鷲寺者與盤門之開元寺皆留行腳僧
靈鷲不能繼有一彬者起而振之重復舊觀一彬退院
傳於永丰是二僧者余皆識之一彬與余伯父侍御公
相契而先府君有偕一彬遊淨慈寺詩曰同遊一彬非
凡夫三十破參世所無蓋一彬先識府君而佛門有所
謂參透三關者一彬能之也先是一彬之友有筆王者
亦與先府君遊旣前死矣余幼時人或稱爲筆玉後身
蓋以神情狀貌言語舉動之似而生初亦有爲之兆者
也及余見一彬一彬亦言其似且言筆玉苦行惟臨終
一念繫戀不得往生淨土爲可惜余問其他日能無繫

戀否曰亦無把握也一彬持戒律甚嚴獨言論通脫口如懸河或拊掌大笑不類他衲子之貌爲篤謹者永丰後至亦能參三關持戒律且過午不食夜趺坐不臥嘗刺血寫佛經數十卷苦志過於一彬其爲人靜默寡言亦與一彬異而其務作功德志在有濟於世則無不同也兩僧者於嘉慶間先後怛化不著靈異余意兩僧若不往生淨土必當仍在世間惜非肉眼所能識耳後二十餘年在京師見兩翰林皆年少一似一彬一似永丰問其生年亦在兩僧死後余疑爲兩僧後身然不知兩翰林生時有無爲之兆者未敢以無稽惑世終未嘗以

身林青蓮平 卷九
語人也及與兩翰林相處愈習觀其神情狀貌言語舉
動愈肖兩僧因思今日余之視兩翰林猶昔一彬之視
余余雖肉眼固已若或啟之而心識之矣古稱蔡中郎
爲張平子後身豈盡誕耶唯是高行如兩僧亦未往生
淨土則其臨終繫戀同於筆玉可知此一彬所云亦無
把握爲可歎也作兩僧傳誌之

考亭書院祭朱子文

卓哉夫子生聖人之後千有餘年獨能表章六籍紹洙
泗之心傳綜覽百家折衷至當以明大道之原尼山木
鐸聲沈而復振昌平禮器數缺而重完自明迄今五百

餘載設科取士莫不宗夫子之言而名儒碩輔忠臣孝
子迭出乎其間實人綱之所維繫名教之所綿延用能
躋十哲軼諸賢祀泮宮而不朽崇配享於文宣嗚呼至
矣嗟南宋之失緒混邪正而比肩夫子立朝未久位在
講筵旋召旋罷厥聞夫子之討論赫赫南康之政又何
罪而削其權天地閉賢人隱其道不行於當世而藏之
名山撫考亭之故址乃杖履所周旋千秋萬歲夫子之
靈爽應於是乎流連小子躬逢

聖代職在輶軒覽俊髦而問俗歷甌越之山川溯先賢
之芳躅覩祠宇之巍然曠百世而起慕信立懦而廉頑

薦椒馨而致敬唯神明其鑒焉

謁伯父秋岳公墓文

惟我伯父孝廉方正贈通奉大夫宗人府丞秋岳公歿之十二年蘊章提學閩南道出里門始得偕弟蘊恭拜謁墓下敢昭告曰嗚呼宿草不哭朋友之施愴深猶子曷禁漣洏惟公敦行孝友持躬是亦爲政何必在公唯公直道不諧流俗內勵廉隅外無表暴惟公守潔不染垢氛戒奢儉情曰儉與勤惟公樂善悅張世德間左飢寒周其衣食公之懿行後嗣其型惟予小子提命親承憶悲帖屺爰在弱齡賴公之庇拯墜扶傾樂其成立憫

其伶仃教之禮義示以準繩俾延門祚弗喪厥名歲紀
壬辰別公北去公雖老病扶杖猶步戒曰慎旃勉趨王
路公歿之年小子登第今一星終駢征孽轡道由故鄉
言尋松隧堯峰東指鳳皇之池佳城手築靈爽憑依日
暮雲陰悲風蕭瑟痛公永潛自傷華髮伫立空山臨風
嗚咽尙饗

祭梁母鄭夫人文

於虞康成之裔人號通經伯鸞之宗代傳嘉偶宜室宜
家如賓如友佐我方伯爲時名臣是爲賢婦爰啟舍人
式亢清門是爲賢母食貧而不戚者德斯貞履盛而不

盈者道可久胡天弗畀夫修齡偕君子分同躋眉壽玉
有時而折蕙有時而摧連理之木有時而中坳七子之
鳩有時而單飛鼓洪鈞於大造合散消息靡得而前知
惟其轉移而莫測也貴余行之不迷是以范滂之母樂
羊之妻志希千載迹奮一時芳烈騰於往古徽音播於
來茲曾女宗之無忝而斤斤於修短之期懿哉夫人之
德允協黃裳清風林下圖史流芳夫人之才庀治中饋
佩玉鷄鳴夙夜匪懈夫人之識洪波不驚從容出險履
尾心亨夫人之惠寒微共仰江甸哀鴻銘恩挾纊奉身
惟約待物惟誠貴能下賤廉不忘貧一椽初卜九族蒙

仁是以彌留之夕成黨奔號鼇山之麓悲風蕭騷者也
章與令子盟深金石夙仰母儀閨門楷式燕臺秋迴雁
帛聲哀東芻迢遞削牘低徊緬維夫人久隨方伯於楚
於吳四方是力胡然偕隱鹿門同遊乃爲夫人志遂營
邱翩翩雛鳳遠舉雲衢翻然斂翼言集粉榆綠柳春穉
公車不發乃爲夫人視含括髮福其備矣名其馨矣寶
家五桂森植庭矣薛門三鳳矯刷翎矣悠悠長夜目其
瞑矣又聞夫人之卒掌夢告祥明璫玉女幢蓋迎將伊
昔雲臺峯下縹緲仙蹤步虛碧落千載誰逢非有慧因
善果而能致幽感之通若此耶於虜鬼神事祕將信將

疑爰據實行弗飾華詞千秋同暮亦又何悲臨風遙奠
彷彿靈旗尙饗

福甯城隍廟祈晴文

伏以惟春發生播兩間之和煦惟神慈惠蘇萬物之困
速具官某按試此邦序逢如月陰霾匝地凜冽兼旬豈
曰無衣傾在笥之春服何其視夜履中庭之肅霜旁顧
幕僚下逮僕從無不蠶僵蝟縮蛩唧蟬嘶相視生嗟欲
歸無術人非金石恐沴戾之爲灾神若矜憐願陽光之
普照非徒哀我行旅亦以惠此居民俾禾稼不傷天札
不作神之賜也尙饗

阮芸臺協揆七十壽序

夫五星遊洛大梁之次騰輝八伯賡雲中天之期復旦
故知晷緯徵祥之代必有岡陵熒壽之臣挺松栢於丹
霄炳鳳麈於赤甸若乃袞衣分陝弧韜來朝侯三接而
稱康衡一德而爲保受福彤弓之宴升庸金鉉之尊伊
古所希於今迺見恭惟我公學際天人道甄苞籙爰自
英歲早踐清華甫逾立年洊登卿貳承明獻賦推第一
之仙才鎖院論文拔無雙之國士駐輜軒於東岱集古
成編詰經籍於西湖翹材闕館石室名山之秘辛彝乙
甌之奇邈邕之所不窺班劉之所未覩靡不憲章絕業

纂述舊聞叩先聖之宮牆躡儒門之堂奧至若建旌闔
外授鉞戎行羽檄星馳牙璋電發惟公定謀帷幄決勝
師于汴水澄波鯨魚不跋嵩山撥霧鳳鳥重聞則又文
武兼資恩威並濟龍圖著號麟閣齊助爰籌六路之正
供遂領八州之重任楚江南北清風則庾亮登樓粵嶺
東西甘雨則盧鈞下馬洎乎滇池移節猓塞投戈鶴陣
演而止齊鶴羽翔而朗潔鑿紫冰於鹽井沃擅熬波採
赤仄於銅山功資合范在

聖主因民之利普大矩以生成而我公與物爲春鼓洪
鈞而輔相允宜芝函昇寵槐鼎翔華郊迎畫鹿之車延

啟匪熊之筮茲者青陽應律姑洗調鐘頌吉甫之降生
美韓侯之入覲履

彤墀而舞蹈開黃閣以論思公惟時亮天工其猷克壯
帝用錫茲多祜乃績丕嘉

上方之賜畢陳

天顏之喜可識繩繩翼翼藹藹萋萋士忭於朝民謌於
野而公方穆天綽提元綱時雨時暘慰四海喁喁之望
作舟作礪答

九重贊贊之心某等叨侍

禁垣欣依樞座奎壁所照光輝日新緝頌制詩情殷口

拙遯自紀分龍鳥契合風雲玉篋書名金甌叶卜黼黻
宣猷之佐球圖翊運之賢接踵旂常比肩竹帛然而東
西兩漢惟韋賢以大儒當軸魏晉六朝惟杜預以開府
通經唐宋而還人才斯茂是故文章林藪則燕許先驅
邊徼干城則范韓並駕攷古今辨得失司馬溫國之宏
通蒐金石訂蟲魚歐陽觀文之博洽昇平潤色則房杜
同音壽考維祺則富文合轍煌煌典冊落落瑰奇若規
矩之各協方圓如尺寸之互有長短而公兼綜前哲隳
枯羣才登泰岳而小衆山滙百川而成巨海福者備也
宜其然乎今以杖國之年入秉鈞之坐撫八絃而載采

膺十賚以延釐

自天之命方申如月之恆共仰將見考逾廿四唐宰相
勿專美於前壽越期頤周太保可爭光於後爾

王省崖相國七十壽序

夫飲醴泉餌芝草導引足以攝生保真宅叩元關逍遙
足以養性必榮名之不繫乃純嘏之攸常則夫周之邵
公臻百八十八上壽唐之郭令閎廿四考中書何以黼黻
乎球圖焜煌乎典冊是知鶴齡綿遠紀海屋以京垓松
節輪囷登巖廊爲楨幹得天獨厚受福孔多恭惟我公
學際天人道甄苞籙初題雁塔卽值鸞坡三長標史館

之才萬選著文壇之譽韋賢篤學旣躋清秩於翰林李
勳老成旋領崇班於詹事固已雲依五采香案親承花
數八磚玉堂近侍摠真儒之實學膺稽古之殊榮矣泊
乎玉尺量才金鍼抽秘騶軒再莅秋風西子之湖雀舫
遙臨潭影滕王之閣勵經生以月旦虎觀談雄表多士
以風裁龍門望峻迨持衡於京兆復秉鑑於春官試院
煎茶念褐衣之鵠立鎖闥撤棘知珊瑚之驪探則又爲
國儲英預培公輔因材篤物盡入洪鈞者也至若奉使
乘輅馳郵鞠獄大江南北花迎油碧之幢泰岱東西鳥
避青髦之節渡錢塘而濤靜艤湘渚而波平識真面於

廬山挹澄流於汴水莫不高懸玉鏡立辨妍媸朗抱冰
壺盡融塵翳佐時雍之

聖化法必持平罄淑問之虛懷謙無留枉是以

宸衷默契要職頻遷旣疊長夫六卿更兼權夫諸鎮當
開府中州之日民樂拊循比建牙畿輔之年士遵訓練
升階晉擢三台之位特尊泰運同符四輔之班並列呼
吸直通

帝座早掌

絲綸出納莫非

王言實司喉舌曩者西陲八戰羽檄馳星上將一麾金

藍樓青畫布
不名
三五
戈投地賴運籌於帷幄銘功鐵蓋之山酬嘉績於袞裳
繪像

紫光之閣爰影翠羽

特賜冰銜公惟益勗靖共上孚

宸眷

帝用深資啟沃俾贊元鈞茲者疆圉紀年夾鍾應律莫
榮三莢椿兆千齡四字

璇題仰

奎章之日煥百朋

錫予瞻寶氣之虹騫士賀於朝民歌於野將見大猷益

展

自天之命重申景福方來如月之恆共祝爾

歸樸龕叢稿卷之九終